


TEZAUUR LITURGIC

8 MAI

ACATISTUL SF. CUVIOS ARSENIE CEL MARE II



MOSCOVA, 2000



Акафист

святому преподобному

Арсению Великому

Кондак 1

Изрядный подвижниче Христов, пустыни пресветлое украшение и монахов пречудное удобрение, преподобне отче наш Арсение! Со Ангелы предстоя ныне Троиипостасному Богу, молися о спасении душ наших, да с любовью зовем ти:

Радуйся, Арсение, великий угодниче Божий.

Икос 1

Ангела во плоти и человека небеснаго ведем ты, преподобне отче Арсение. Ты бо, от знатнаго рода происходя, отринул еси мирское знание, богатство и честь и смиренным клириком восхотел быти, сего ради вопием ти:

Радуйся, благочестивых родителей отрасль пречестная;

Радуйся, приявый от них доброе воспитание.

Радуйся, наукам греческим и римским изрядно обученный;

Радуйся, премудростию небесной свыше

одаренный.

Радуйся, во диакона церкви Римския
поставленный;

Радуйся, иерейскаго сана недостойным себе
считавый.

Радуйся, Арсение, великий угодниче Божий.

Кондак 2

Видя твое святое тщание ко спасению, призва
тя Господь исперва общему благу послужити,
ради отечества и славы Божией, сынов царевых
воспитати и обучити. Послушный велению
Божию, ты, отче Арсение, Рим древний оставил
еси, в немже в простоте и неизвестности
определил себе жити и ко дворцу Феодосия
Великаго предстал, воспевая Богу: Аллилуия.

Икос 2

Разума Божественнаго исполненный, добре
наставлял еси, отче Арсение, детей царя
земнаго, сподобляем от него чести и величия, но
душа твоя, воспаряя к небесному, помышляла
токмо о жизни вечной. Темже и вопием ти:
Радуйся, яко сенаторским званием почтен был
еси;
Радуйся, яко к славе сердца не прилагал еси.
Радуйся, вся красная мира презревый;
Радуйся, от соблазнов и искушений ангелом
своим огражденный.

Радуйся, во дворце молитвы не оставлявый;
Радуйся, и тамо единое на потребу искавый.
Радуйся, Арсение, великий угодниче Божий.

Кондак 3

Силою Божиею водимый, свыше чаял еси
вещания, отче преподобне, на кий спасительный
путь вступить и был тебе глас во сне от Господа:
«Арсение, бегай людей и спасешися». Сему
Божественному зову последуя, ты царский двор
оставил еси и в обителище иноков стопы своя
направил, воспевая Богу: Аллилуия.

Икос 3

Имея неопальное желание Господу служить, в
пустыню Скитскую, блаженне отче, вселился еси
и скоро в подвизех иноческих преуспел, от
великаго Иоанна Колова наставляем; темже
глаголем ти:

Радуйся, от царской чести и людей бежавый;

Радуйся, честнаго монашества просивый.

Радуйся, старцу и иноческому послушанию себе
предавый;

Радуйся, на подвиги себе посвятивый.

Радуйся, до зела смиривыйся;

Радуйся, странником и человеком убогим
объявивыйся.

Радуйся, Арсение, великий угодниче Божий.

Кондак 4

Бурю страстей миновал еси, богомудре Арсение, оградив себе постом, бдением, молитвою и в пристань благодатного покоя души достиг, воспевая Богу: Аллилуия.

Икос 4

Слышав паки глас небесный: «Арсение, бежи от человек и в молчании буди: ибо сие есть корень безгрешия», - в глубочайшую пустыню удалился еси и тамо святому безмолвию совершенно предался, яко и приходити к себе возбранял и лица своего никому же показавал еси. Сего ради вопием ти:

Радуйся, спасительнаго безмолвия учителю;
Радуйся, иноческих обетов верный исполнителю.
Радуйся, о сказанных словесех каявыйся;
Радуйся, о молчании николиже жалевый.
Радуйся, пением птиц не хотевый развлекатися;
Радуйся, яко беседою с Богом любил еси присно наслаждаться.
Радуйся, Арсение, великий угодниче Божий.

Кондак 5

Богоприятный источник радостотворнаго плача имел еси, преподобне, нося при поясе плат, да им оттираеши молитвенныя слезы обильно истекавша из твоих пресветлых очес,

соделывая душу твою плодоносну ко всякому делу благому, подвизая пети тя Богу: Аллилуия.

Икос 5

Виден был неким братом на молитве, яко во огни стоящим, ибо воистину пламенел еси любовию к Богу Живому, пришедшему грешныя спасти. Дивящися убо сей твоей огнепальней любви ко Господу, ублажаем тя благохвалениями сими:

Радуйся, дар умиления стяжавый;

Радуйся, выну себе укорявый.

Радуйся, о захода до восхода солнца трезвивыйся;

Радуйся, с воздетыми руцemi в нощи моливыйся.

Радуйся, яко Бог в тебе и ты в Бозе пребывавый;

Радуйся, непрестанным богомыслием всего себе освящавый.

Радуйся, Арсение, великий угодниче Божий.

Кондак 6

Проповедник монашескаго делания был еси, преподобне, не словесы и речами, а великими подвиги твоими. Сего ради не оставил ни письменных книг, ни посланий, разве малыя изречения, в нихже отобразися твой лучезарный ум, яко в зеркале. Темже и вопием просвещему тя Богу: Аллилуия.

Икос 6

Возсиял еси великими добродетельми не токмо в пустыни Скитстей, но и далече за пределы ея и подражаху твоему богоугодному житию мнози отцы, якоже и Евфимий Великий в Палестине подвизавыйся. Прославляя болезни и труды твоя, вопием ти:

Радуйся, нищету духовную и телесную стяжавый;

Радуйся, от наследия и дани отказавыйся.

Радуйся, худою одеждою своею всех иноков превосшедый;

Радуйся, нужду и в срачице имевый.

Радуйся, вместо одра рогозину постилавый;

Радуйся, гнилую воду, яко ароматы обонявый.

Радуйся, Арсение, великий угодниче Божий.

Кондак 7

Хотя Господь явити отцам пустынным, отче Арсение, твоего безмолвнаго жития совершенство, показа единому от них в видении, како корабль твой в велицем безмолвии не человеки и не ангелы, а Самим Господом управляется: и тако всем ведомо сотворися, яко бегая от человек с Богом соединился еси, зовый Ему: Аллилуия.

Икос 7

Ново и дивно бысть житие твое, преподобие
отче Арсение, яко никто же от иноческаго
сословия восходил на столь дивную степень
безстрастия, на кую восшел еси ты, достигнув
ангельския чистоты. Зряща ты во плоти,
небеснаго человека, глаголим ти:

Радуйся, целомудрие души и тела неврединно
сохранивый;

Радуйся, огонь похоти плотския погасивый.

Радуйся, взора жен избежавый;

Радуйся, образы их в ум николиже державый.

Радуйся, кроткое и незлобивое сердце имевый;

Радуйся, пустынное озлобление сладце
претерпевый.

Радуйся, Арсение, великий угодниче Божий.

Кондак 8

Странником и пришельцем на земли, по слову
святаго апостола, рекшаго: «не имамы зде
пребывающаго града, но грядущаго взыскуем», -
ты, преподобие, почитал еси себе, преходя от
места на место, да ближее станеша ко Господу,
взывая Ему: Аллилуия.

Икос 8

Весь ум свой к Богу возвысив, ты, отче святой,
дремания веждом своим не дал еси, присно
бодрствуя, моляся и трезвяся. Сего ради вопием

ти:

Радуйся, со сном, яко со злым демоном
боровыйся;

Радуйся, один час сна для себе довольным
считавый.

Радуйся, да не впадеш в расслабление, -
учеников своих назирати просивый;

Радуйся, над плетением корзин добре
трудивыйся.

Радуйся, скудную пищу вкушавый;

Радуйся, овощи единожды в год принимавый.

Радуйся, Арсение, великий угодниче Божий.

Кондак 9

Вся заповеди верно исполнил еси, преподобне, и
такое угодил Господеви, яко сословие
монашеское нарекоша тя «Великим», воспевая
Богу: Аллилуия.

Икос 9

Вития многовещанныя не могут сравниться с
тобою, отче Арсение, в познании души
человеческия, яко не токмо иноцы искаху твоего
наставления, но и святители к тебе приходяху.
Ты же, чужд быв человекоугодия, от всех двери
келлии своея затворял еси, почитая у простецов
учиться науке из наук - спасению души, неже
самому учителем быть. Того ради вопием ти:
Радуйся, благодатными дары преукрашенный;

Радуйся, духом разсуждения обогащенный.
Радуйся, богомудренно учеников своих
назидавый;
Радуйся, спящую совесть их искусно
пробуждавый.
Радуйся, страхом Божиим яко щитом от злых
приражений защищенный;
Радуйся, старче Божий, свыше просвещенный.
Радуйся, Арсение, великий угодниче Божий.

Кондак 10

Спасения душевное стяжал еси, святче Божий,
многими труды и поты, и образ преподобия и
благочестия оставил всем иночествующим, да
последуя стопам твоим, велегласно вопиют Богу:
Аллилуия.

Икос 10

Стена крепка бысть произволение твое, отче
наш Арсение, в делании духовнем, ибо
николиже забывал еси речений Господа:
«никтоже возлож руку свою на рало, и зря
вспять, управлен есть в Царствии Божии». Сего
ради бодренно нес иго Христово, дондеже
достиг Небеснаго Царствия, идеже и
пребываеши со всеми святыми, подвизая нас
пети тебе тако:
Радуйся, несокрушимую твердость в подвизех
явивый;

Радуйся, всецело воле Божией себе предавый.
Радуйся, на всех путех жизни Промыслом
водимый;
Радуйся, от варвар и злых обстояний многажды
хранимый.
Радуйся, великим терпением от Господа
наделенный;
Радуйся, мужеством, яко каменем укрепленный.
Радуйся, Арсение, великий угодниче Божий.

Кондак 11

Пение со безплотными чины горе ныне принося
ко Пресвятей Троице, Арсение богомудре, ты
уже zde на земли яко ангел пожил еси, любви
Христовой быв исполнен, ибо вещал учеником
своим: «всех любите и от всех ради любви ко
Господу бегите». Тою же любовью распаляемь ко
ближнему своему, ты инока, одержимаго
немощью крадения, на исправление в келлию
принял еси, поя Богу: Аллилуия.

Икос 11

Светоподательный светильник явился еси, отче
Арсение, всему иноческому роду, сияя
добродетельми, наипаче же спасительным
смирением, имже стяжал еси в сердце своем
Духа Святаго. Темже и величаем тя тако:
Радуйся, образ смиренномудрия показавый;
Радуйся, ниже всея твари себе считавый.

Радуйся, простоте иноков вельми подражавый;
Радуйся, яко не от себе, а от лица старцев
ответы вопрошавшим тя дававый.
Радуйся, со смирением строгий нрав
соединивый;
Радуйся, яко всего себе ни во что же вменивый.
Радуйся, Арсение, великий угодниче Божий.

Кондак 12

Благодать Христову приобрел еси, преподобне,
помогати всем с любовию творящим память
твою. Сего ради молимся ти: вразуми ны не
миру, а Богу благоугождати, Ему Единому
служи и Его святому водительству себе
вручати, яко же и ты сие в житии своем
исполнил еси, глаголя: «аще не Господь сохранит
мя, то ми низачимже жити на земли». Поминая
твоя сия святая словеса, взываем
Промыслителю Богу: Аллилуия.

Икос 12

Поюще твое безмолвное житие, отче наш
Арсение, дивимся и всем подвигом твоим,
адаманта веры, надежды и любве к Богу тя
имуща. Темже и глаголем ти:
Радуйся, всех заповедей Христовых рачителю;
Радуйся, ведений Божественных тайнозрителю.
Радуйся, яко час смертный присно поминал еси;
Радуйся, яко не погребати, а низвергнути тело

свое завещал еси.

Радуйся, в маститей старости умерый;
Радуйся, Безкровную жертву себе совершати повелевый.

Радуйся, Арсение, великий угодниче Божий.

Кондак 13

О, великий угодниче Божий, преподобне отче наш Арсение! Приими малое сие моление в похвалу тебе приносимое и умоли возлюбленного тобою и возлюбившаго тя Господа, да сподобит ны прочее время живота нашего в покаянии, без порока прейти и мирно о Боже почити, воспевая Ему: Аллилуия.

Этот Кондак читается трижды, затем читается Икос 1 и Кондак 1

Молитва

Кую похвалу принесем ти, преподобне и богоносне отче наш Арсение! Ты еси воистину ангел хранитель всем христианам, наипаче же иночествующим, кои имя твое святое на себе носят! Во время земнаго жития твоего, ты, преподобне, бегал еси людей, показуя сим не неприязнь к ближним, а наивящую к ним любовь, дабы в безмолвии, стяжав в сердце своем Единого Бога, получить сугубое дерзновение ходатайствовать у престола Божия о духовных чадех твоих! И, о, дивно сие твое

предстательство!

Ты от искушений и падений спасаеши, от наветов злых духов и человеков сохраняеши, от уз и темниц свободяеши, из изгнания возвращаеши, всякия беды и напасти от нас прогоняеши.

Чим же возблагодарим ти за твое велие нам вспоможение, святче Божий?!

Мним, яко лучшим тебе приношением будет исправление нашея греховныя жизни и подражание твоей богоугодней, святей.

Ты был еси украшен духовным разсуждением, твердой волею в отражении всякаго зла, процвел еси трудами и подвигами. Да поможет Господь и нам молитвами твоими все сие по силе нашей имети.

Ты, пресвятый отче, стяжал еси дар смирения, дар молитвы, дар умиления и благодатных слез: да даст Отец Небесный и нам хотя малую толику причаститься твоим великим сим дарованиям.

Ты, пречудный авво, возлюбив простоту и нищету телесную даже до убожества, приобрел еси Господа даже до богатства духа благодати; да с тобою и мы терпеливо понесем скудость, лишения, все невзгоды земныя и, уповая на небесное жительство, возлюбим нашего

Сладчайшаго Спасителя, выну прославляя Отца, и Сына, и Святаго Духа. Аминь.



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НОВОЕ
ИЗДАНІЕ**